

نقطة

نقطه من أول الهم
لما بفرح بلاقي الفرحة
ممزوجه بطعم الحزن
مش لاقى وصف
جوايا للون الفرح
دموع تنزل وأنا فرحان
وضحكه مليانه بكل الحزن
وبين الفرح وأحزاني
أنا عايش بقول
يمكن يسيبني الهم
في وسط الزحمة والزيطه
والاقي شروق لأيامي

شعاع من نور حواليا
ينور فجر أحلامي
سنين عايش وأقول أصبر
أتاري الصبر مش صابر
وراكن ضهره ع الحيطه
بيتوجع وحاله يغم
سنين الحزن
مشتاله لبعده ممات
وجوه القلب
عمال أغزل كتير حكايات
ياسارق م السنين فرحي
وعامل روحك مش شايف
بكام الفرحة بتبيعه
وأنا شاري وزى ما تقول

ماهو مش معقول
أعيش العمر وأنا
مليش في الفرح ولا لحظه
وعامل م الأمل مجداف يعديني
ولما أوصل لأخر الحزن
أعيد الكره م الأول
ياسارق م السنين فرحي
كفايه شبعت م الأحزان
مستني لحظة فرح
ولو عابره تكون عنوان
تقول للحزن بقى كفايه
مشتاق أدوق الفرح لو لحظة